

## Kameradschaft Kerweborsch

De Karl, de Schorsch unn isch hawwe omm letzde Freidaach zesommegetze unn iwver die Flerschemer Kerb gebabbeld. Ess iss joo schunn enn Aacheblig her, dass mir Kerweborsch gewese sinn, nor grad emol 62 Jahr, awwer mir dun uns noch immer gern onn unser Kerb im Jahr 1954 erinnern.

De Oolass ferr unser Gebabbel iss gewese, dass die Kerweborsch su enn Zeddel in de Briefkassde geworfe hawwe, mett emm Bild druff wie se aussehe dun unn wasse su vorhawwe in de nächsde Daache.

Die sehn gut aus, die Kerweborsch 2016, hott de Karl gesaad, genau wie mir doomols. Josses naa, su jung sinn mir aach emol gewese.

Ja, hott de Schorsch gemoond, wenn merr die Kerweborsch su sehe dut, kann merr sich vorstelle, dass dess aach lusdische Brieder sinn, grad su wie mir sellemols.

Warum aach nitt, habb isch gesaad, de erst emol hott die Flerschemer Kerb e Tradition unn donn dut jeder Johrgong noch e bissi was Eischenes debei. Su iss dess bei uns gewese unn bei alle Johrgäng.

Unn su wie mir moone, seet de Karl, dass mir die bessde Kerweborsch aller Zeide gewese sinn, su dun die meisde, die iwverhaupt emol Kerweborsch gewese sinn, aach denke unn dess iss grad gut.

Isch habb genickt: Awwer ferr uns war die Kerweborschzeit schunn seit de Vize de Oofong vunn ebbes gons Eischenem, isses nitt su? Ob dess awwer bei dene Johrgäng vunn de letzde Jahr su iss? Denkt droo, mir warn iwver verrzisch Monn, hawwe uns all schunn aus de Volksschul gekennnd unn weil mir aach nitt nor onn Noochkerb, naa, die gons Woch iwver zwische Kerb unn Noochkerb jeden Daach dorsch Flerschem gezoosche sinn unn in jeder Wertschaft scheene Krach gemacht hawwe, iss doomols ebbes worrn, was mir schunn ewisch unn drei Daach e Kameradschaft nenne dun.

De Schorsch hott merr uff die Schulter gekloppt. Unn donn hawwe merr e paar Jahr später, doo warn die meisde vunn uns schunn verheirat, mett unserne Fraue unn mett de Mädcher aus unserm Johrgong oogefonge, de finfunnzwozischde Gebortsdaach sesomme ze feiern. Unn aach dess hawwe merr dorschgehalle, ab emm dreissischsde alle zeh Jahr unn monschmol alle finf Jahr.

Mensch, seet de Karl, was hawwe merr zum Fuffzischsde e Ding gemacht, wissderr noch? Mett unserm Kamerad Conny Schramme, dem Conny Nelson, in de Stadthall, nitt nor ferr uns, naa, ferr all die Flerschemer, die de Conny sehe wollte. E mords Sach iss dess gewese.

De Karl seet: Unn dess iss dess, was merr moone, ob die Kerweborsch vunn heit aach e Kameradschaft werrn?

Isch habb de Kobb geschiddeld. Ihr Männer, denkt emol onn eier Kinner, die jetz, merr kann saache, in gons Deitschlond odder aach in de gons Welt dehoom sinn. Vunn unserne Kameradschaft sinns nor e paar, die nimmi in Flerschem sinn.

Seet de Schorsch: Merr deets dene junge Leit winsche, dass sie sich aach noch in fuffsisch Jahr treffe unn su wie mir heit iwver die Kerweborschzeit babbele unn iwver dess, wasse sesomme gemacht hawwe. Weil Erinnerung sinn wie Altgold unn dess muss aach ab unn zu emol gebutzd werrn.